

Kálaad ábêê Pwôl nyə á cilə Timotê yé

Isâ í dúgyá nə kálaad ábêê mə Pwôl shú mə Timotê yí

Kálaad ábêé mə Timotê ηgə nyîn nə Pwôl nyə á bə Róma ja nyə á cilə nyə yí (1.17). Í á jəla nə bə Pwôl ηgə jág jug mímbwugəd (2.9) a músə a tál fwó (4.10, 16). Nda nyə á mpu nə iséy byé í mə shîn a wál zə yə nə (4.6), nyə á ka cilə muud nyə á bə nyə fwámé múúd gwoonɔŋ á cɛlí yé (1.2), yə nyə məcwûη.

Pwôl mə tééd fwo yə Zembî akíba nə búgə Timotê ji nə ndí yí. Nda á bwey mpu nə obwiηgye ó Jɔjɔ Lâη bwé dɛ jug, dɛ bwəma nə cúwálí nə, a bándúló Timotê nə a yímúg nyúul ja məkugulɛ mə bə yí, a gwána nda fwámé «mwâ zimbî mə Krîst», lwóya íŋkáj. (1.3–2.13). A mpú bándulə nyə nə a jíig ncê nə buud bwé dɛ té mbɛɛ ílís-lís nə ozhuyá nə isâ í dɛ sá nə buud bwé wúg búgə dí wá. A mú ci nə a bég yuug jé, nyə Pwôl, a dɛ cugə nda mílósú mí Zembî mí ηgə ci nə, kú fúfug (2.14–4.5). A mú kə shínal kálaad nə ηkánɔgúlá ηkánɔgula cé nyáméfwó tál yí, a ηgə lɔ Zembî muud nyə á ηgə shúgal nyə yé (4.6-22).

Pwôl ηgə lwó nə nyə a mə gwána gwáná á kaambulələ nə Jɔjɔ Lâη nə ndéé kə wóós məshíné mə cug jé (4.7). A ηgə jii ja jêsh nə buud bwé lɔ kálaad éga wá bwé gwánág gwáná jəonɔgú kú nə ifwaas, nda fúndə mízhízhíη, ηgə gwána nə búgə, nə jísów, nə cɛlí, nə nadâ.

Məbədə

¹ Mə wə ηgə cilə kálaad éga, mə Pwôl. Zembî nyə a jii ná mə bəg *muud lwámá mə *Krîst Yésus, shú ná mə bwíingug buud cug nyə á kaag ná a bá yə bwo wə Krîst Yésus yí. ² Mə cilə wo Timotê mwân waam mə búl cœel yé. Zembî Sóóηgú bá Cwámba wúsú Krîst Yésus bwə ó sá wo mpaam, bwə ó gwág wo cœy lámád, bwə ó sá námə ná wo cágəg mpwogé.

Pwôl ηgə yə Zembî akíba

³ Mə ηgə yə Zembî ódá bwə á du yə gúmə yé akíba. Nyə námə wə mə ηgə yə gúmə mitédúgá myá lâm mí njúl mə fúbán yé. Mə du wá wo mádí məjəgula dí ja jêsh, təo ibulú təo mimwásá. ⁴ Mə ηgə bul tédugá yé dwô, mə ka ηgə bul jii ná shwə dúgyág mə búlug bə nə məshusug. ⁵ Mə ηgə téduga búgə gwô, búgə á kú nə məkəη, búgə ηgwúd nə ηgwúd mpáámbə gwô Loyís bá nyəəηgú woó Enís bwə á bə nə ndí yí. Mə ηgə mpu búbálé ná búgə jəəηg námə wə wó jí nə ndí yí.

Magulag jug shú Jəjə Kéel

⁶ Gwə wə mə bándúlə wo ná: ηgagú nə gwíing sâ Zembî nyə á yə wo ja mə á bəd wo məbwə yí. ⁷ Nəcé *shíshim Zembî nyə á yə shé yí í cúgə shíshim ífwaas; í yidá bə shíshim í du sá ná muud búlug bə nə ηkul, nə cœlí, a du jwú nə lâm yé yí. ⁸ Ntó mə kə ná wo ajáláyé nə gwág shwôn nə ηgələ bwiing lân mə Cwámba íshé tām buud, wo nda námə gwág mə shwôn nda mə jí mímbwug dí ná. Yidagú magulə nə wo júgug námə nda mə shú Jəjə Kéel, shwə ηgə *búgula ηkul mə

1:1 1Tm 2.7 **1:2** Timotê: 1Tm 1.2; 1Kr 4.17 **1:3** Flp 3.5; 1Tm 1.5 **1:5** Mis 16.1 **1:6** bəd wo məbwə: 1Tm 4.14; 5.22 **1:7** Rom 8.15 **1:8** 2.9; Rom 1.16

Zembî. ⁹ Nacé nyə wá nyə á cug shé, a jôw shé ná shé bág buud bé; nyə a shígé jôw shé ntó ná shé á fwo sá jɔjɔ mísóólúgú, í á bæ nji nacé nyəméfwó nyə á ŋwa cigúlá ná a sá shé mpaam. Nyə á bwey cɛɛlə shé mpaam nyɔɔŋg kwonə mə *Krîst Yésus dí, shí ga nda fwo tééd. ¹⁰ A má ka lwó shé mpaam nyɔɔŋgú ja gaád nə zálə cugye íshé Krîst Yésus nyə á zə lwóya nyúúl yí. Nyə wá nyə a má zə caam ŋkul shwiy í á dɛ bæ nə ndí yí, a zə nə Jɔjɔ Kéel zə sá ná shé mpúg cug jí kú bá bwele shîn yí.

¹¹ Jɔjɔ Kéel dɔɔŋg wá Zembî nyə á təl mə nə mə ŋgág nə bwiŋg yí, mə bág *muud lwámá, mə bæ nə zhií mə jíígúlí búúd. ¹² Gwá wá má ŋgá jísow minjugú yí; nji mə agwágé myo shwôn, nacé mɛɛ mə mpú múúd má á má búgala yé; mə mpú búbálé ná a jí nə ŋkul mpu baagulə sâ jêsh má yá nyə ná a bááguləg yí, mə kə bá ŋwa gwo jwôw á məzhúgúlá.

¹³ Iciyá yâ obúbálé wó á lág nə mə yí, ŋwag byo tân yuug, ŋwag byo nə búgá nə cɛɛlí í ŋgá zhu wá Krîst Yésus yí. ¹⁴ Sâ wo á yíyow yí, wo ó baagulə gwo nə kwíindyá má Nkɛŋkɛ Shíshim njúl shédí yé.

¹⁵ Wo mpú ná buud ɔ Azî bêsh bwé á má myaas mə, tɛɛm bæ Fizhêl bá Erəmozhên. ¹⁶ Cwámba gwágúg njów búúd má Onezifôr cey lámád. Nacé nywáá nyə á dɛ wá mə ŋkul nyúúlád, kú gwág mə shwôn nə mə jí mímbwugud. ¹⁷ Nyə á yida ŋgə sɔ mə nə zény ja nyə á wós Róma yí, a mú kwey mə. ¹⁸ Cwámba Yésus sáág ná Zembî bág gwág nyə cey

1:9 Ifz 2.8-9; Tit 3.5 **1:10** Yuá 1.14; Tit 3.6 shwiy ... cug jí kú bá bwele shîn yí: 1Kr 15.20, 55, 57; Heb 2.14-15 **1:11** 1Tm 2.7 **1:13** 1.5; 1Tm 1.10 **1:14** 1Tm 6.20 **1:15** 4.16 **1:16** Onezifôr: 4.19

lámúd jwów á mæzhúgúlâ. Wo ntâg wé mé búl mpu bímbí lú kwíindyá nyə á kwíind mæ Ifêz yí.

2

Pwôl ηgə cwîny mwân yé

¹ Mwân waam, ság ná mpaam mé *Krîst Yésus í lúlushig wo! ² Sâ jêsh wó á gwág mé á jííḡuli zhwog owúshined bwé njúl yí, kalagú gwo, yə búúd wó mé dúg ná bí abúgúlág wá, bân bwé bág nə ηkul mæ jííḡulí bóólúgá búúd. ³ Jísówúg dwó kəw lú mínjugú tâη nda fwámé zimbi mæ Krîst Yésus. ⁴ Muud ηḡé sêy séy ízimbi yé, ja á cœel ná mása yé gwágúḡ nyə nywa yí, nyə ádé na nyiḡə kənd lám zhizhe ísád. ⁵ Bwé dū bwééd ηgwiimbe ígwiimbí *túm gúmá nji ja á ntḡ nda mácœœ mé ígwiimbí mæ cí ná. ⁶ Mbœye mæmpəḡ nyə á wáduga yé, nyə wé mé jéla nə fwo tééd mwááḡulə mpúmá. ⁷ Faasúḡ ísâ mé ηḡé cí yí, Cwám̄ba nyə e sá ná wo wám̄búlḡḡ byêsh.

⁸ Wo ə tédúḡá Yésus-Krîst nyə á byêl mpwoη buud mæ *Dávid dí, nyə á gwúm yé. Jəjə Kéel mé ηḡé bwiḡḡ wé ni. ⁹ Mə jì mímbwug dí nda zhiḡḡḡaanə nəcé mæ ηḡəḡə bwiḡḡ Milású mí Zembí myœḡḡ. Nji, mæ tœm bə mímbwug dí, muud cuḡé nə ηkul wóolə Milású mí Zembí mæḡkəda. ¹⁰ Gwé wé í sá ná mæ ηḡḡḡ nə jísow ísâ byêsh, shú ná buud Zembí nyə a féesh wá bwé bííḡ cuḡ Yésus nyə á zə nə ndí yí, bwé ka bá bə nə milwanə mí ábúle bwéle shîn yí. ¹¹ Ciyá ábúgúlág jí ná:

Nkí shénəη Yésus shé á yə,

shénónη mé bá námá nyingə cugə.

¹² Shé mé ká yím mányúúl,

shénónη ka bá jwú.

Shé mé ká kílya nyə,

a bá námá kílya shé.

¹³ Shé mé ká bæ kú sá sâ á cí yí,

nywáá bæ námá nji abúgúlág,

nəcé a cugé nə ηkul kílya nyóméfwó.

Wo ηgə sêy mísh mǎ Zembî dí

¹⁴ Báásúlág búúd isâ íni. Yímbúlíg bwo mísh mǎ Zembî dí né bwé bég kú dɛ bɛ dúlə bigas íciyá né ndéé mbigas kə nyɛ ózhuyâ. Sâ jəŋg í akwííndé tɔɔ sâ, í yida kweemushi búúd bwé gwágulə wá.

¹⁵ Wáág ηkúl né wo dúg nyín mísh mǎ Zembî dí né wo mé ntɔ məkugulu, wo ji sɔɔl məsáal cúgə nə sâ shwôn yé, sɔɔl məsáal ηgə bwiing búbálé mǎ Zembî mbií í jála yé.

¹⁶ Wo nda dɛ kənd málwê mbéé zhizhe mikaand mí ηgə lúmbuli nə búgə myáád. Buud bwé dɛ lás mbií mikaand myəŋg wá bwé bá ηgə kə nji shwóg-shwóg nə Zembî.

¹⁷ Iciyá byán í bá dɛ də búúd nda fəŋ ηkwaambá í dɛ də múúd nyúúl ná. Imene bá Filêt bí mbií búúd wəŋg.

¹⁸ Bwé ηgə jaaw buud né gwúmúshílə sə ηgə ci nǎ Zembî mə bá gwúmushi búúd yí í á mǎ bwey bæ. Ja bə ηgə ci ntɔ yí, bwé mǎ shwáda wú óbúbáléd kə koogú, bwé ηgə sá nǎ bóɔl búúd búgə í shwágúság.

¹⁹ Nji, tɔɔ jí tɔɔ jí, lal-lal lámuga Zembî nyə lám yí, jáá jí ná námá né shím; Zembî nyə á cilə cínəŋg lámuga jəŋg dí nǎ: «Cwám̄ba mə mpú búúd bí búúd

2:12 Mat 10.32-33; Rom 5.17 **2:13** Rom 3.3-4 **2:14** 1Tm 1.3-7; 6.4; Tit 3.9 **2:15** 1Tm 1.10 **2:16** 1Tm 1.4 **2:17** Imene: 1Tm 1.20 **2:19** Iŋ 16.5; Yuá 10.14

bé wá», a nyingə námé cilə ná: «Muud yêsh má du kámb Cwámba yé má jəlá nə béégya nə olíingŋ».

²⁰ Njów má fwámé múúd í ádé bə nji nə ishúyá bwə á lúlə nə or ŋkí ntāg kwóógú bwə du lúlə *mwaanê nə ndí yí; í du námé bə nə byəŋg ísâ bwə á caag nə ilí yí, nə byəŋg bwə á mɛ nə yagá yí. Bíl bísə byəŋg bwə du balan nə ndí mǎfwála mə gúmá dí yí; bílúgá, bwə du balan nə ndí ja í cúgé fwála gúmá yí.

²¹ Muud mə myáás bów-bôw mínjígúlá mə ámə ŋgə ci míni yé, nyə é bə shúyá gúmá. Muud wəŋgú nyə é bə ŋkɛŋkɛ múúd, a bə nə mfíí shú má Zembî muud njów, a bə kwésha ná búsə nə ŋkul balan nə nyə shú wúl jəjə sólúgú wêsh.

²² Túbúg íyéesh í ŋgə bul julə məsás nə mənchwémá yí; wo yida sə ná wo cúgəg cug á tətəlí, cug búgə, cug cɛlí, cug á ná shɛɛ. Bínŋŋ buud bwə ŋgə jów Cwámba nə milám fúbán wá, bi cúgəg gwo nə lâm wêsh. ²³ Dugú ban séŋúsálə búúd bwə du séŋusa mǎkəl kú nə wúmbúlé nda mikás yí. Nəcə séŋúsálə mǎkəl wəŋgú í ábweyé nə du shúgula ózhuyâ. ²⁴ Í njúl ná sól məsáal mə Cwámba nyə ajáláyé nə du bə nə ozhuyâ, á jəlá nə yidá bə nə osusa nə muud yêsh, a du mpu jíguli búúd, a du bə nə jilələ lâm. ²⁵ A jəlá nə du sá ná, bəŋg bwə sá nyə oŋkwafad wá, a cwíny bwo ná shɛɛ, a ŋgə bwánd ná ka Zembî nyə é yə bwo fwála ná bwə céndúg mítédúgá ná ndéé bwə zə mpu óbúbélé, ²⁶ bwə mú nyingə bii fwámé mítédúgá ná ndéé bwə mú cugya wú ŋkwaŋg mə Njwû məjamb dí kúl nyə á wá bwo mímbwug myéd ná bwə dúg gwág nji nə nyə yí.

3

Bów-bów ísâ í bá s̄y mwów mâ mæzhúgúlâ d̄i

¹ Mpug ná mwów mâ mæzhúgúlâ di, mól máfwála mé bá bə ηkí lal cug. ² Nəcə buud bwé bá bə nə íbíí, bwé bul cɛel *mwaanê. Bwé bá bə nə bəgəwa, bwé də ηkēny mányúul, də *lás nə Zembî bwaasúlə mpu, sá obyól bāη mælwê, nda də l̄q mánywa, kú gw̄ɔ̄ Zembî. ³ Bwé bá bə nə ηkúd, bwé ábúle də magulə juu búúd, bwé bá də sá íkúdúgú, də sá ísâ nə jwuη, də bə nə mənyaan, kú cɛel mánywa. ⁴ Bwé bá də bə ηgwól kusha ηgwól, ηgwól kusha ηgwól, bwé bá bə nda bwé cúgέ nə milúu, də jág ηkēny mányúul, bwé bá cɛel máshweesh mé cug nt̄ Zembî. ⁵ Bwé bá də nyîn nda buud bwé ηgέ gw̄ɔ̄ Zembî wá, n̄j̄i bwé nda mpu ηkúl mé Zembî í də cénd búúd yí. Wo ɔ bá də t̄w búúd bəηg shwóg-shwóg.

⁶ Ból bəηg bwé də kyey nə minjígúla myán minjów minjów; budá bwé ηgέ wáduga nə kúdá lú *misám, íyéesh mimbií mimbií í ηgέ kə nə bwo c̄ɛ kə nə bwo c̄ɛ wá, bwé də biil mínjígúla myəηg dí, nda óshû bwé də biil ηkwaηg dí ná. ⁷ Búsə n̄j̄i bwé ɔ də ηwa mínjígúla, nda ka bwelə mpu óbúbálé. ⁸ Námə nda Zhanés bá Zhambres bwé á lumbuli nə Moyíz ná, ntó námə wə óyíguli bəηg bwé ηgέ lumbuli nə óbúbálé yé. Mitédúgá mí mú bwo oncúg-nculé mílúúd, jáη búgá í á mé yə íyíy-yíy. ⁹ N̄j̄i, sóólúgú wáη í ábúlé bugəban, nəcé buud bēsh bwé é mpu ná

3:1 1Tm 4.1; 2Pr 3.3; 1Yn 2.18; Yúd 18 **3:2** Gal 5.19-21 **3:5** Mat 7.15, 21; Rom 2.19-20; Tit 1.16 **3:6** Tit 1.11 **3:8** MmN 7.11, 22; 8.3, 14; 1Tm 6.4-5

bâñ bwé ñgə cugə íwushí dî námə nda íwushí í Zhanés bá Zhambres í á mpûy ná.

Nadagú ni isâ wó á jǐg mádí yí

¹⁰ Wεε gwó kóomb di, wo á bε minjǐgǐlǎ myâm, wo ñwa kuú ñjənd wâm, wo mpu íyug mə ñgə yigǎla yí, nə búgə jâm, nə cug mə ñgə cugə kú nə milámusa yí, nə cεlí jâm, nə zény mə jí nə ndí shú kélə shwóg yí. ¹¹ Wo mpú nda búúd bwé á wáámb mə nə cúwǐlí ná, wo mpú bímbí jugǐlǎ mə á jug Antyósh nə Ikóniyum nə Lístrə yí. Byáyé ífamuga mə áshígé jísow yí? Nji, isâ íni byêsh í á tεm ñgə wáámb mə, Cwámba nyə á ñgə sá nə mə fáámug. ¹² Mpug nə buud bēsh bwé céél cugə cug í yá Zembí gúmá kwoñ mə Yésus-Kríst wá bwé bá bwəma nə cúwǐlí. ¹³ Nji, bəəñg bí mímbúwǐlú wá nə bəəñg wá məshǐgá bwé bá yida ñgə jág bul sá məbôw, bwé ñgə yíl bóól búúd zhííd, bwáméfwó bwé ñgə námə yíləw.

¹⁴ Wεε gwó kóomb di, nadagú nə isâ wó á jǐg wo magulə nə lám wô yí; wo mpú ntág buud wó á jǐg isâ byəəñg bwédí wá. ¹⁵ Wó bwey mpu Micilyá mí Zembí tééd ná wo ñjúl mwántombú. Micilyá myəəñg mí nə ñkul sá nə muud bég nə fug shú cug búúd bwé ñgə bii nə búgǐlǎlǎ Yésus-Kríst yí. ¹⁶ Zembí wə nyə a lwó buud cilyá wēsh bwé á cilə yí; ntó, cilyá wēsh wúsə nə mfíí shú jǐgǐlǐlǎ búúd obúbálé, nə bágǐlǎlǎ íwushí, nə sǐgǐlǎ yíl búúd íwushí dî, nə jǐgǐlǎlǎ búúd cug á tátəlí, ¹⁷ shú nə muud mə Zembí

3:10 Rom 16.24; 1Tm 1.5 **3:11** Mis 13.50; 14.5; 14.19 jugǐlǎ mə á jug: Sôm 34.20; 2Kr 11.23-29 **3:12** Mat 16.24; Yuá 15.20; Mis 14.22; 1Te 3.3 **3:14** 2.2; 1Tm 1.10 **3:15** Yuá 5.39; Rom 15.4; 1Tm 4.13; 2Pr 1.21 **3:17** 2.21

bæg nə ɲkul kwag sâ jêsh, sá nda fúfə nyə shú sálə sóólúgú wêsh wí ɲkí nywa yí.

4

Timotê bwíngug Jɔjɔ Kéel

¹ Mə ɲgə lás nə wo mísh mə Zembî bá Yésus-Krîst dî. Mə lás nə wo, námə nda *Krîst Yésus mə bá nyiŋgə zə ná, námə nda á bá zə sám̄b búúd milésú tɔɔ mímbimbə tɔɔ mikuwó ná, námə nda á bá zə tâl íjwûga byé ná. ² Mə lás nə wo ná, cúndág Ciyá mə Zembî, báásúlág tɔɔ fwála í jəla, tɔɔ í ajáláyé; dugú lwó búúd iwushí byán, dugú jum, də cwîny; ísâ íni byêsh dí, kú nə milámusa, wo mbíd nji yéesh jígúlílə. ³ Nəcə dúl fwála í bá bə, buud bwé ábúle ná də cɛel gwág fwámé njígúlá. Bwé bá yidá də bɛ íyéesh byán, də sɛɛŋgya nə oyíguli bwé də jaaw bwo isâ í də lugə bwo málwəd yí. ⁴ Bwé ábúle ná də kənd málwə óbúbáléd, bwé bá yida də gwágulə míkaanə. ⁵ Nji wɛɛ dugú cunal iyéesh byô ja jêsh, wo ɔ jísów micúŋ, wo ɔ wá nyúúl bwiŋgúlə Jɔjɔ Lánúđ, sá ísɛy byô mbií í jəla yí.

⁶ Mɛɛ mú nda cúdú bwé zə cígə yə Zembî *mətúnuga yé, wəla lú ɲjɔnd dām í mə wós. ⁷ Mə á mə gwána jɔjɔ gwáná, mə mə casulə kúlə mə á ɲgə ju yí, mə a mə baagulə búgə. ⁸ Tééd kíkidíga, *túm gúmə í músə mə ɲkwəmusá, túm gúmə í lwó ná Zembî mə ci ná mə ji tátəlí yí. Cwám̄ba, muud jí sém̄bye milésú atútəlí yé, nyə wé mə bá yə mə yuug

4:1 Mis 10.42; 2Kr 5.10; 1Pr 4.5 **4:2** Mis 20.20, 31; Tit 1.13 **4:3** 1Tm 1.10; 4.1 **4:4** 1Tm 1.4 **4:6** Flp 2.17; 2Pr 1.14 **4:7** 1Kr 9.24-25; Flp 3.12-14; 1Tm 1.18

jəɔŋg jwôw dɔɔŋgúd; nyə abúle yə nji mə, a bá námá yə bəɔŋg bēsh bwé ŋgá cɛel ná a nyíŋgəg zə wá.

Isâ í lâm

⁹ Wáág ŋkûl ná wo lálug zə kwey mə. ¹⁰ Démas mə myaas mə nəcé a jág bul cɛel cug á mwôw mága. Nyə a má kə Tesaloníka, Kresáns má kə Galátia, Titus kə Dalmatí. ¹¹ Nji Lúkas wé sá bí wa yé. Wo ɔ ŋwa Márkus zə nə nyə, nyə é zə kwíind mə ísýúd. ¹² Mə a má kənd Tishik Ifêz. ¹³ Ja wó bá zə yí, wo ɔ bá zé nə mə káándá yêŋ mə á lágə Truwás wé Karəpus yí; wo ɔ bá námá zé nə okálaad, bul bə ná ndéé bəɔŋg bí síyá nə ikúúdú í cúdú wá.

¹⁴ Aləguzándrə álúlə mikwambé nyə á bul sá mə məbôw. Cwámba mə bá yə nyə myəna myâ misóólúgú myé. ¹⁵ Wo ó də námá káálugə nə nyə, nyə á bul lumbəli nə kéel dúsú.

¹⁶ Jwów mə á tééd kə shwə nyúúl mpáánzə milésú yí, mə a shígé bə nə muud mə kwíind mə, buud bēsh bwé á myaas mə. Zembî kə juu bwo nə bów-bôw sóólúgú wəŋ wəɔŋgúd. ¹⁷ Nji, Cwámba nyə a shí kwíind mə, nyə á ləlushi mə mbíí á ná mə á bwiŋg kéel dé dēsh, mə sá ná ikûl ishús byêsh í gwágúg dwo. Nyə a tí yíl mə májə mə zhwambánkwuŋ dî. ¹⁸ Cwámba nyə e bá námá də yíl mə bíl ísâ í mábôw byêsh dí, a mú bá sá ná mə kág nyíi Faan dé á gwówúd kú shwúg jús kú bwim bəɔgú. A bég nə gúmá kandugə á kandugə! Amen.

4:10 Flp 2.21 Démas: Kol 4.14; Flm 24; 1Yn 2.15; Tit 1.4 **4:11**
 Lúkas: Kol 4.14 Márkus: Kol 4.10 **4:12** Tishik: Kol 4.7-8 **4:13**
 Mis 20.6 **4:14** Mat 16.27 Aləguzándrə: 1Tm 1.20 **4:16** 1.15
4:17 Dan 6.21; Sôm 22.22; Mis 1.8; 23.11 **4:18** 2Kr 1.10; Flp
 1.19-20

Məbədə

¹⁹ Wo ɔ bədə mə Priska bá Akilas nə njów búúd mə Onezifôr. ²⁰ Erâst nyə a lúg Kərênt, mə a lúgə Trofîm Milêt a ngə bwás. ²¹ Wáág ñkúl ná wo zág ñkwân nda fwo zə shí. Nə Ibulus nə Púdens nə Línus nə Klodía nə ból bʷááŋg bēsh bwé ngə bəda wo. ²² Cwám̄ba jíg nə *shíshim wô! Zembî ké sá bí mpaam.

Kálaad Zembî : Sə, á Gúgwáan New Testament in Makaa

copyright © 2014 Wycliffe Bible Translators, Inc.

Language: Makaa

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2014, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Makaa

© 2014, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files
dated 29 Jan 2022

d1606f4a-0ada-5be8-9b44-23b40e4b3495